

রুবাইয়াৎ-ই-হাফিজ

বাবা বুলবুল !

তোমার মৃত্যু-শিয়রে বসে 'বুলবুল-ই-শিরাজ' হাফিজের রুবাইয়াতের অনুবাদ আরম্ভ করি। যেদিন অনুবাদ শেষ করে উঠলাম, সেদিন তুমি—আমার কাননের বুলবুলি—উড়ে গেছ ! যে দেশে গেছ তুমি, সে কি বুলবুলিস্তান ইরানের চেয়েও সুন্দর ?

জানি না তুমি কোথায় ! যে লোকেই থাক, তোমার শোক-সম্প্রাপ্ত পিতার এই শেষ দান শেষ চুম্বন ব'লে গ্রহণ করো।

তোমার চার বছরের কচি গলায় যে সুর শিখে গেলে, তা ইরানের বুলবুলিকেও বিশ্বেশ্বরিত করে তুলবে।

শিরাজের-বুলবুল-কবি হাফিজের কথাতেই তোমাকে স্মরণ করি,—

‘সোনার তাবিজ রূপার সেলেট

মানাত না বুকে রে যার,

পাথর চাপা দিল বিধি

হায়, কবরের শিয়রে তার।’

মুখবন্ধ

আমি তখন স্কুল পালিয়ে যুদ্ধে গেছি। সে আজ ইংরেজি ১৯১৭ সালের কথা। সেইখানে প্রথম আমার হাফিজের সাথে পরিচয় হয়।

আমাদের বাঙালি পল্টনে একজন পাঞ্জাবি মৌলবী সাহেব থাকতেন। একদিন তিনি দীওয়ান-ই-হাফিজ থেকে কতকগুলি কবিতা আবৃত্তি করে শোনান। শুনে আমি এমনি মুগ্ধ হয়ে যাই, যে, সেইদিন থেকেই তাঁর কাছে ফার্সি ভাষা শিখতে আরম্ভ করি।

তাঁরই কাছে ক্রমে ফার্সি কবিদের প্রায় সমস্ত বিখ্যাত কাব্যই পড়ে ফেলি।

তখন থেকেই আমার হাফিজের ‘দীওয়ান’ অনুবাদের ইচ্ছা হয়। কিন্তু তখনো কবিতা লিখবার মত যথেষ্ট সাহস সঞ্চয় করে উঠতে পারিনি। এর বৎসর কয়েক পরে হাফিজের দীওয়ান অনুবাদ করতে আরম্ভ করি। অবশ্য তাঁর রুবাইয়াৎ নয়—গজল। বিভিন্ন মাসিক পত্রিকায় তা প্রকাশিতও হয়েছিল। ত্রিশ-পঁয়ত্রিশটি গজল অনুবাদের পর আর আমার ধৈর্যে কুলোল না, এবং ঐখানেই ওর ইতি হয়ে গেল।

তারপর এস. সি. চক্রবর্তী এন্ড সন্সের স্বত্বাধিকারী মহাশয়ের জোর তাগিদে এর অনুবাদ শেষ করি।

যেদিন অনুবাদ শেষ হ’ল, সেদিন আমার খোঁকা বুলবুল চলে গেছে।

আমার জীবনের যে ছিল প্রিয়তম, যা ছিল শ্রেয়তম তারই নজরানা দিয়ে শিরাজের বুলবুল কবিকে বাংলায় আমন্ত্রণ করে আনলাম।

বাংলার শাসনকর্তা গিয়াসুদ্দিনের আমন্ত্রণকে ইরানের কবি-সম্রাট হাফিজ উপেক্ষা করেছিলেন। আমার আহ্বান উপেক্ষিত হয়নি। যে পথ দিয়ে আমার পুত্রের “জানাজা” (শবযান) চলে গেল, সেই পথ দিয়ে আমার বন্ধু, আমার প্রিয়তম ইরানী কবি আমার দ্বারে এলেন। আমার চোখের জলে তাঁর চরণ অভিষিক্ত হ’ল ...।

অন্যত্র হাফিজের সংক্ষিপ্ত জীবনী দিলাম। যদি সময় পাই, এবং পরিপূর্ণ “দীওয়ান-ই-হাফিজ” অনুবাদ করতে পারি, তখন হাফিজের এবং তাঁর কাব্যের পরিপূর্ণ পরিচয় দিবার চেষ্টা করব।

সত্যকার হাফিজকে চিনতে হলে তাঁর গজল-গান—প্রায় পঞ্চাশতাধিক—পড়তে হয়। তাঁর রুবাইয়াৎ বা চতুষ্পদী কবিতাগুলি পড়ে মনে হয়, এ যেন তাঁর অবসর সময় কাটানোর জন্যই লেখা। অবশ্য এতেও তাঁর সেই দর্শন, সেই প্রেম, সেই শারাব-সাকি তেমনিভাবেই জড়িয়ে আছে।

এ যেন তাঁর অতল সমুদ্রের বুদ্ধ-কণা। তবে এ ক্ষুদ্র বিশ্ব হলেও এতে সারা আকাশের গ্রহ-তারার প্রতিবিশ্ব পড়ে একে রামধনুর কণার মতো রাঙিয়ে তুলেছে। হয়ত ছোট বলেই এ এত সুন্দর।

আমি অরিজিন্যাল (মূল) ফার্সি হতেই এর অনুবাদ করেছি। আমার কাছে যে কয়টি ফার্সি ‘দীওয়ান-ই-হাফিজ’ আছে, তার প্রায় সব কয়টাতেই পঁচাত্তরটি রুবাইয়াৎ দেখতে পাই। অথচ ফার্সি সাহিত্যের বিশ্ববিখ্যাত সমালোচক ব্রাউন সাহেব তাঁর *History of Persian Literature*-এ এবং মৌলানা শিবলী নোমানী তাঁর “শেয়রুল-আজম”-এ মাত্র ঊনসত্তরটি রুবাইয়াতের উল্লেখ করেছেন; এবং এই দুইজনই ফার্সি কবি ও কাব্য সম্বন্ধে authority—বিশেষজ্ঞ।

আমার নিজেরও মনে হয়, ওঁদের ধারণাই ঠিক। আমি হাফিজের মাত্র দু’টি রুবাইয়াৎ বাদ দিয়েছি—যদিও আরো তিন চারটি বাদ দেওয়া উচিত ছিল। যে দু’টি রুবাইয়াৎ বাদ দিয়েছি তার অনুবাদ নিম্নে দেওয়া হল। সমস্ত রুবাইয়াতের আসল সুরের সঙ্গে অন্তত এই দু’টি রুবাইয়াতের সুরের কোনো মিল নেই। বেসুরো ঠেকবে বলে আমি এ দু’টির অনুবাদ মুখবন্ধেই দিলাম।

১. জমায় না ভিড় অসৎ এসে

যেন গো সৎলোকের দলে।

পশু এবং দানব যত

যায় যেন গো বনে চলে।

আপন উপার্জনের ঘটায়

হয় না উপার্জনের মুগ্ধ কেহ,

আপন জ্ঞানের গর্ব যেন

করে না কেউ কোনো ছলে।

২. কালের মাতা দুনিয়া হতে,

পুত্র, হৃদয় ফিরিয়ে নে তোর !

যুক্ত করে দে রে উহার

স্বামীর সাথে বিচ্ছেদ ওর।

হৃদয় রে, তুই হাফিজ সম

হ’স যদি ওর গন্ধ-লোভী,

তুইও হবি কথায় কথায়

দোষগ্রাহী, অমনি কঠোর !

রুবাইয়াতের আগাগোড়া শারাব, সাকি, হাসি, আনন্দ, বিরহ ও অশ্রুর মধ্যে, এই উপদেশের বদ-সুর কানে রীতিমত বেথাপ্পা ঠেকে।

তাছাড়া কালের বা সময়ের মাতাই বা কে, পিতাই বা কে, কিছু বুঝতে পারা যায় না।

আমার অনুবাদের আটত্রিশ নম্বর রুবাই-ও প্রক্ষিপ্ত ব'লে মনে হয়। কেননা প্রথম দুই লাইনের সাথে শেষের দুই লাইনের কোনো মিল নেই, এবং ওর কোনো মানেও হয় না। দিনের ঔরসে রাত্রি গর্ভবতী হবেন, এ আর যিনি লিখুন—হাফিজ লিখতে পারেন না।

এজন্যই ব্রাউন সাহেব বলেছেন, ফার্সি কবিতার সবচেয়ে শুদ্ধ সংস্করণ হচ্ছে—তুরস্কে প্রকাশিত গ্রন্থগুলি। তাঁর মতে—তুর্কি নাকি হিন্দুস্থানী বা ইরানীর মত ভাবপ্রবণ নয়। কাজেই তাঁরা নিজেদের দু'দশ লাইন রচনা অন্য বড় কবিদের রচনার সাথে জুড়ে দিতে সাহস করেনি বা পারেনি। অথচ ভারতের ও ইরানের সংগ্রাহকেরা নাকি ঐরূপ দুঃসাহসের কাজ করতে পশ্চাৎপদ নন এবং কাজও তা করেছেন।

এ অনুযোগ হয়ত সত্যই। কেননা আমি দেখেছি, ফার্সি কাব্যের (ভারতবর্ষে প্রকাশিত) বিভিন্ন সংস্করণের কবিতার বিভিন্ন রূপ। লাইন, কবিতা উল্টোপাল্টা তো আছেই, তার ওপর কোনটাতে সংখ্যায় বেশি কোনটায় কম কবিতা। অথচ তুরস্ক-সংস্করণ বই সংগ্রহ করাও আমাদের পক্ষে একরূপ অসাধ্য। ...

হাফিজকে আমরা—কাব্য-রস-পিপাসুর দল—কবি ব'লেই সম্মান করি, কবি-রূপেই দেখি। তিনি হয়ত বা সুফি-দরবেশও ছিলেন। তাঁর কবিতাতেও সে আভাস পাওয়া যায় সত্য। শুনেছি, আমাদের দেশেও মহর্ষি দেবেন্দ্রনাথ ঠাকুর, কেশব সেন প্রভৃতি হাফিজের কবিতা উপাসনা-মন্দিরে আবৃত্তি করতেন। তবু তাঁর কবিতা শুধু কবিতাই। তাঁর দর্শন আর ওমর খায়ামের দর্শন প্রায় এক।

এঁরা সকলেই আনন্দ-বিলাসী। ভোগের আনন্দকেই এঁরা জীবনের চরম আনন্দ বলে স্বীকার করেছেন। ইরানের অধিকাংশ কবিই যে শারাব-সাকি নিয়ে দিন কাটাতেন, এও মিথ্যা নয়।

তবে, এও মিথ্যা নয় যে, মদিরাকে এঁরা জীবনে না হোক কাব্যে প্রেমের আনন্দের প্রতীকরূপেই গ্রহণ করেছিলেন।

শারাব বলতে এঁরা বোঝেন—ঈশ্বরের, ভূমার প্রেম, যা মদিরার মতোই মানুষকে উন্মত্ত করে তোলে। 'সাকি' অর্থাৎ যিনি সেই শারাব পান করান। যিনি সেই ঐশ্বরিক প্রেমের দিশারী, দেয়াসিনী। পানশালা—সেই ঐশ্বরিক প্রেমের লীলা-নিকেতন।

ইরানী কবিদের অধিকাংশই তথাকথিত নাস্তিকরূপে আখ্যাত হলেও এঁরা ঠিক নাস্তিক ছিলেন না। এঁরা খোদাকে বিশ্বাস করতেন। শুধু স্বর্গ, নরক, রোজকিয়ামত (শেষ বিচারের দিন) প্রভৃতি বিশ্বাস করতেন না। কাজেই শাস্ত্রাচারীর দল এঁদের উপর এত খাল্লা ছিলেন। এঁরা সর্বদা নিজেদের “রিন্দান” বা স্বাধীনচিন্তাকারী, ব্যভিচারী ব'লে সম্বোধন করতেন। এর জন্য এঁদের প্রত্যেককেই জীবনে বহু দুর্ভোগ সহ্য করতে হয়েছিল।

হাফিজের সমস্ত কাব্যের একটি সুর—

“কায় বেখবর, আজ ফসলে গুল্ ও তরকে শারাব।”

“ওরে মূঢ় ! এমন ফুলের ফসলের দিন—আর তুই কিনা শারাব ত্যাগ করে বসে আছিস !”

আমাকে যাঁরা এই রুবাইয়াৎ অনুবাদে নানারূপে সাহায্য করেছেন, তাঁদের মধ্যে আমার শ্রেয়তম আত্মীয়াধিক বন্ধু গীত-রসিক শ্রীযুক্ত নলিনীকান্ত সরকার অন্যতম। তাঁরই অনুরোধে ও উপদেশে এর বহু অসুন্দর লাইন সুন্দরতর হয়ে উঠেছে। যদি এ অনুবাদে কোনো ত্রুটি না থাকে, তবে তার সকল প্রশংসা তাঁরই।

কলিকাতা
১লা আষাঢ়
১৩৩৭

বিনয়াবনত
নজরুল ইসলাম

রুবাইয়াৎ-ই-হাফিজ

১

তোমার ছবির ধ্যানে, প্রিয়,
দৃষ্টি আমার পলক-হারা ।
তোমার ঘরে যাওয়ার যে-পথ
পা চলে না সে-পথ ছাড়া ।
হায়, দুনিয়ায় সবার চোখে
নিদ্রা নামে দিব্য সুখে,
আমার চোখেই নেই কি গো ঘুম,
দগ্ধ হ'ল নয়ন-তারা ॥

২

আমার সুখের শত্রু হতে
লুকিয়ে চ'লে আয় লো ত্বরা ।
আয়েশ-সুখের আমন্ত্রণ আজ,
শারাব দিয়ে পাত্র ভরা ।
ঈর্ষাতুরের কুমন্ত্রণায়
কোথায় যাবে, হে মোর ভীকু ?
আমার প্রিয়া ! শোনো শুধু
আমার কথা দুখ-পাসরা ॥

৩

করল আড়াল তোমার থেকে
যেদিন আমার ভাগ্য-লেখা,
সেদিন হতে ফোটেনি আর
আমার ঠোঁটে হাসির রেখা ।
কী নিদারুণ সেই বিরহের
বাজল ব্যথা আমার হিয়ায় ;—
আমি জানি, আর সে জানে
অন্তর-বিহারী একা ॥

৪

আমার সকল ধ্যানে জ্ঞানে
 বিচিত্র সে সুরে সুরে
 গাহি তোমার বন্দনা-গান,
 রাজাধিরাজ, নিখিল জুড়ে !
 কী বলেছে তোমার কাছে
 মিথ্যা করে আমার নামে
 হিংসুকেরা,—ডাকলে না আজ
 তাইতে আমায় তোমার পুরে ॥

৫

আনতে বল পেয়ালা শারাব
 পার্শ্ব বসে পরান-বঁধুর।
 নিঙাড়ি লও পুষ্প-তনু
 তন্মঙ্গীর অধর-আঙুর।
 আহত যে—ক্ষত-ব্যথায়
 সোয়াস্তি চায়, চায় সে আরাম ;
 বিষম তোমার হৃদয়-ক্ষত,
 ডাকো হাকিম কপট চতুর ॥

৬

ভাবনু, যখন করছে মানা
 বন্ধুরা সব আগলে ভাঁটি—
 দিলাম ছেড়ে এবার ফুলের
 মরশুমে ভাই শারাব খাঁটি।
 ফুল-বাগিচায় বুলবুলিরা
 উঠল গেয়ে,—হায় রে বেকুব,
 এমন ফাগুন, ফুলের ফসল,
 নাই কো শারাব ?—সকল মাটি ॥

৭

বিশ্বে সবাই তীর্থ-পথিক
 তোমার পথের কুঞ্জ-গলির।
 ছুটছে নিখিল মক্ষি হয়ে
 তোমার আনন-আনার-কলির।

আজকে যদি তোমার থেকে
মুখ ফিরিয়ে রয় গো কেহ,
কোন চোখে কাল দেখবে তোমায়
হায় রে বে-দিল্ সেই মুসাফির।

৮

তোমার আকুল অলক—হানে
গভীর ছায়া রবির করে।
শুভ্রা চতুর্দশীর শশী
তোমার মুকুট, আঁধার হবে।
ও-কস্তুরী-কালো কেশের
নিশান ওড়ায় সন্ধ্যারানী,
হেরে ও-মুখ, —উদয়-উষা—
পাগুর চাঁদ ডুবে মরে॥

৯

ভিন্ন থাকার দিন গো আমার
আজকে পরান-প্রিয়ার সাথে।
বন্ধু নিয়ে খুশির মউজ—
নেই গো সময় আজকে রাতে।
কি ফল র'য়ে সাবধানে আজ,
কাছে যখন নেইকো শারাব ?
না, না,—কাছে শারাব আছে,
নেইকো প্রিয়াই মন ভোলাতে॥

১০

আমার পরান নিতে যে চায়
ঐ নিঠুরা রূপের পরী,
পরীর মতই রূপেরে সে
রাখে আঁখির আড়াল করি।
কইনু তারে, “তুমি যে কও,
এই ত এ-মুখ, কী আর এমন ?”
জবাব দিল, “তাই ত বলি
লোভ করো না এ মুখ সুরি।”

১১

রক্ত-রাঙা হ'ল হৃদয়

তোমার প্রেমের পাষণ-ব্যথায়।

তোমার ও-রূপ জ্ঞান-অগোচর,

পৌছে না কো দৃষ্টি সেথায়।

জড়িয়ে গেল তীরু হৃদয়

তোমার আকুল অলক-দামে,

সন্ধ্যা-কালো কেশে বাঁধা

দেখছি ওরে ছাড়ানো দায় ॥

১২

রবি, শশী, জ্যোতিষ্ক সব

বন্দা তোমার, জ্যোতির্মতি !

যেদিন হ'তে বন্দা হ'ল—

পেল আঁধার-হরা জ্যোতি।

রাগে-অনুরাগে মেশা

তোমার রূপের রৌশনীতে

চন্দ্র হলে স্নিগ্ধ-কিরণ

সূর্য হ'ল দীপ্ত অতি ॥

১৩

যেদিন হ'তে হৃদয়-বিহগ

ব্যথার জালে পড়ল ধরা,

সেই হ'তে তার মাথার স্পরে

ঝুলছে ছুরি রক্ত-ঝরা।

ত্যক্ত আমি হাতের কাছের

পেয়ালা-ভরা শরবতে, তাই

ক'রতেছি পান-পাত্রে ব্যথার

রক্ত আমার হৃদয়-ক্ষরা ॥

১৪

আমার করে তোমার অলক

জড়িয়ে বীণার তারের মত।

এ হৃদি-ভার আমার—শুধু
 তোমার ঠোটে হয় আনত।
 চিকন তোমার ও-মুখখানি
 ভুখা হিয়ার সাস্বনা মোর
 সর্ব-গ্রাসী মোর ক্ষুধার খোরাক
 ঐ দেহটুক ? হায় বিধাতঃ !!

১৫

তোমার পথে মোর চেয়ে কেউ
 সর্বহারা নাইকো, প্রিয় !
 আমার চেয়ে তোমার কাছে
 নাই সখি, কেউ অনাত্মীয়।
 তোমার বেষীর শৃঙ্খলে গো
 নিত্য আমি বন্দী কেন ?—
 মোর চেয়ে কেউ হয়নি পাগল
 পিয়ে তোমার প্রেম-অমিয় ॥

১৬

দলতে হৃদয় ছলতে পরান
 দক্ষ সদা আমার প্রিয়া।
 তারি মিলন মাগি বুঝে
 ভাগ্য-হত আমার হিয়া।
 গোলাব-ফুলী গাল গো তাহার,
 রূপালি মুখ, চিকন অধর ;
 ফুলকে ভোলায় ফুল্লমুখী
 মিঠে হাসির ছিটেন দিয়া ॥

১৭

পরান ভরে পিয়ো শারাব,
 জীবন যাহা চিরকালের।
 মৃত্যু-জরা-ভরা জগৎ,
 ফিরে কেহ আসবে না ফের।
 ফুলের বাহার, গোলাব-কপোল,

গেলাস-সাথী মস্ত ইয়ার,
এক লহমার খুশির তুফান,
এই ত জীবন !—ভাবনা কিসের ॥

১৮

আয়না তোমার আত্মার গো—
তরল তোমার ঐ লাবণী ।
সাধ জাগে ঐ ধ্যানের চরণ
করি আমার নয়ন-মণি ।
না, না, আমার ভয় করে গো,
নয়ন-পাতার কাঁটায় পাছে
কমল-পায়ে বাজে ব্যথা !
ধেয়ানে থাক সারাক্ষণই ॥

১৯

রঙিন মিলন-পাত্র প্রথম
পান করালে ইমানদারী ।
নেশায় যখন বঁদু হয়েছি—
জল বিছালে অত্যাচারী ।
আঁখির সলিল-ধারা গো, আর
বুকের আগুন-জ্বালা নিয়ে
ভেজাই পোড়াই আপনারে
পথের ধূলি হয়ে তারি ॥

২০

তোমার মুখের মিল আছে, ফুল,
সাথে সে এক কমল-মুখীর ।
যে-ফুল হেরে দিল্ দেওয়ানা,
গন্ধ যথা সদাই খুশির ।
সাধ জাগে-এক ফুলদানীতে
রাখি তোরে আর তাহারে,
ফুলেল ঠোটে চুম্ব নিতে
লাগবে সুবাস পুষ্প-মদির ॥

২১

আপন করে বাঁধতে বুকে
পারেনি কেউ তবু প্রিয়ার—
জ্ঞান-বুদ্ধি-বিস্ত মাঝে
বদ্ধ থাকে চিন্ত যাহার।
আমার কথা ঠাঁই পেল না
চপল-আঁখি প্রিয়ার কানে—
রক্ত-দুল্ সে রইল পড়ে,
কর্ণে কভু উঠল না আর !

২২

সোরাই-ভরা রঙিন শারাব
নিয়ে চলো নদীর তটে।
নিরভিমান প্রাণে বসো—
অনুরাগের ছায়া-বটে।
সবারই এই জীবন যখন
সেরেফ্ দুটো দিনের রে ভাই,
লুট করে নাও হাসির মধু,
খুশির শারাব ভরো ঘটে॥

২৩

তোমার হাতের সকল কাজে
হবে শুভ নিরবধি—
প্রিয়, তোমার ভাগ্যবেশে
নিয়তির এই নিদেশ যদি ;
দাও তাহলে পান করে নিই
তোমার-দেওয়া শিরীন শারাব,
হলেও হব চির-অমর,
হয়ত ও-মদ সুখা-নদী॥

২৪

কুঁড়িরা আজ কার্বা-বাহী
বসন্তের এই ফুল-জলসায়।
নার্গিসেরা দল নিয়ে তার
পাত্র রচে সুবার আশায়।

ধন্য গো সে-হৃদয়, যে আজ
বিশ্ব হ'য়ে মদের ফেনায়
উপচে পড়ে শারাব-খানার
তোরণ-দ্বারের পথের ধুলায় ॥

২৫

কুন্তলেরি পাকে প্রিয়ার—
আশয় খোঁজে আমার পরান ।
অভিশপ্ত এই জীবনের
কারার থেকে চায় যেন ত্রাণ ।
“কী দেবে দাম” শুধায় তাহার
দেহের গেহের রূপ-দুয়ারী
প্রিয়ার ভুরুর তোরণ-তলে
পরান দিলাম নজরানা দান ॥

২৬

চাঁদের মত রূপ গো তোমার
ভরছে কলঙ্কেরি দাগে ।
অহঙ্কারের সোনার বাজার
ডুবছে ক্রমে ক্রান্তি-কাগে ।
লজ্জা অনেক দেছ আমায়,
প্রেম নাকি মোর মিথ্যা-ভাষণ !
আজ ত এখন পড়ল ধরা
কলঙ্ক কোন্ মুখে জাগে ॥

২৭

রূপসীরা শিকার করে
হৃদয়-বনের শিকারীকে
দেহে তাহার রূপের অধিক
অলঙ্কারের চমক লিখে
নার্গিস—যার শিরে হের
ফুলের রানীর মুকুট-পর্য
নিরাভরণ—তবু তারই
রটে খ্যাতি দিগ্বিদিকে ॥

২৮

তোমার ডাকার ও-পথ আছে
 ব্যথার কাঁটায় ভরে খালি।
 এমন কোনো নেই মুসাফির
 ও-পথ বেয়ে চলবে, আলি !
 জ্ঞানের রবি ভাস্বর যার,
 তুমি জান কে সে সুজন—
 প্রাণের রূপের পিলসুজ্জে যে
 দেয় গো ব্যথার প্রদীপ জ্বালি ॥

২৯

যেদিন আমায় করবে সুদূর
 তোমার থেকে কাল-বিরহ,
 পড়বে যতই মনে, ততই
 দিন হবে মোর দুর্বিষহ।
 ভুলেই যদি এ চোখ পড়ে
 আর-কোনো রূপসীর রূপে,
 অন্ধ আমি বইব তোমার
 রূপের দাবি অহরহ ॥

৩০

দাও মোরে ঐ গেঁয়ো মেয়ের
 তৈরি খাঁটি মদ পুরানা।
 তাই পিয়ে আজ গুটিয়ে ফেলি
 জীবনের এই গালচে'খানা।
 যদি ধরার মন্দ ভালো
 দাও ভুলিয়ে মস্ত করে,
 জানিয়ে দেবো এই সৃষ্টির
 রহস্যময় সব অজানা ॥

৩১

পূর্ণ কভু করে নাকো
 সুন্দর-মুখ দিয়ে আশা।
 প্রেমের লাগি যে বিবাগী—
 ভাগ্য তাহার সর্বনাশা।

প্রিয়া তব লক্ষ্মী সতী
তোমার মনের মূর্তিমতী ?
প্রেমিক-দলের নও তুমি কেউ,
পাওনি প্রিয়া-ভালোবাসা ॥

৩২

মদ-লোভিরে মৌলোভী কন,—
পান করে এই শারাব যারা,
যেমন মরে তেমন করে
গোরের পারে উঠবে তারা ।
তাই ত আমি সর্বদা রই
শারাব এবং প্রিয়ার সাথে,
কবর থেকে উঠব—নিয়ে
এই শারাব, এই দিলপিয়ারা ॥

৩৩

তারি আমি বন্দা গোলাম,
সৌখিন যে রস-পিয়াসী ।
গলায় যাহার দোলায় বিধি
পাগল প্রেমের শিকলি ফাঁসি ।
প্রেমের এবং প্রেম জানানোর
স্বাদ অ-রসিক বুঝবে কিসে ?
পান করে এ সুরার ধারা
সুর-লোকের রূপ-বিলাসী ॥

৩৪

হয় না ধরার বিভবরাশি
জোর জুলুমে হস্তগত,
আনন্দের এই জীবন-সুধার
পায় নাকো স্বাদ বিষাদ-হত ।
খুঁজছ তুমি পাঁচটা দিনের
দুঃখ ভোগের পরিশ্রমে,
সাত শ' হাজার বছর ধরে
জন্মল ধরায় খুশি যত ! !

৩৫

আনন্দ আর হাসি-গানের
 প্রমত্ততার সময় হলো,
 পেয়ালা, শারাব, দিল-দরদী,
 দিলরুবা নাও, বেরিয়ে চলো !
 একটি ফুঁয়ের এই ত জীবন !
 তাই ত বলি, ক্ষণেক তরে
 ঝুঁজোর আগুর-রক্ত ঢেলে
 গলাস বাটি রঙিয়ে তোলা !

৩৬

দরবেশ—আমার সামনে এল
 ফিরে তোমার সেই বিরহ,
 বুকের কাটা ঘায়ে যেন
 নূনের ছিটে দুর্বিষহ।
 ভয় ছিল যে, তোমার থেকে
 আর কিছুদিন রইব দূরে,
 দেখছি শেষে আসল আবার
 সেই অশুভ দিন অ-বহ ॥

৩৭

বিষাদ-ক্ষীণ এ অন্তরে মোর
 থাকে যেন তোমার নজর,
 তৃণ কুটোর পরেও ত গো
 পড়ে রবির প্রভাতী কর !
 যদি তোমার পথের ধূল
 হই গো প্রিয়,—নারাজ হয়ে
 গাল দিও না ! পাছে শোনে
 পথের ধূলি তোমার সে স্বর ॥

৩৮

বিশ্বাসেরে মেরে—হল
 প্রাণের বন্ধু শত্রু শেষে,
 কত পথিক পথ হারাল
 অবিশ্বাসের গহন দেশে।

পুরুষ—‘দিবার ঔরসে গো
 ‘রাত্রি’ নাকি গর্ভযুতা,
 দেখল না যে পুরুষ—হল
 ধূতগর্ভা কেমনে সে ॥

৩৯

ক্ষত হৃদয় যেমন চাহে,
 হয় যদি গো, তেমনিটি হোক ।
 নয় উড়ে যাক হৃদয়-বিহগ
 অলখ-বিহার আত্মার লোক ।
 আজও খোদার দরগাতে গো
 এতটুকু ভরসা রাখি,
 সকল দুয়ার খুলবে গো তার
 ভাগ্যদেবীর স্বর্গ অ-শোক ॥

৪০

কি লাভ, যখন দুষ্ট ভাগ্য
 হাসল নাকো মুখ ফিরিয়ে,
 পেল না দিল সুখের সোয়াদ,
 দিন কাটাল ব্যথাই নিয়ে !
 যে ছিল মোর চোখের জ্যোতি,
 পুতলা আঁথির, গেছে চলে !
 নয়ন-মণিই গেল যদি,
 কি হবে এ নয়ন দিয়ে ॥

৪১

সকল-কিছুর চেয়ে ভাল
 সুরাই-যখন কাঁচা বয়েস,
 প্রণয়-বেদন, মন্ততা, পাপ—
 যৌবনেরি একার আয়েশ ।
 এই যে তামাম দুনিয়াটা-ই
 বরবাদ আর খারাব রে ভাই,
 মন্দ ধরায় মন্দ যা—তার
 প্রমত্ততাই মানায় যে বেশ ॥

৪২

আয়ুর মরু বেয়ে এলো
 ক্ষ্যাপা প্লাবন আকুল ধারায়,
 এই ত জীবন-পান-পিয়ালা
 ভরার সময় কানায় কানায় ।
 ইঁশিয়ার হও সাহেব ! যেন
 খুশি হয়ে কালের কুলি
 তোমার জীবন-গেহ থেকে
 আসবাব সব উঠিয়ে নে' যায় ॥

৪৩

আলতো করে আঙুল রেখে
 প্রিয়ার কালো পশমী কেশে,
 কইনু তারে, 'দাও গো জীবন,
 এসেছি অমৃতের দেশে ।'
 কইল প্রিয়া, 'অলক ছাড়,
 তার চেয়ে এই অধর ধর !
 ঝুঁজে নাকো দীর্ঘজীবন—
 ফুর্তি মউজ ওড়াও হেসে' ॥

৪৪

বিন্দ্র কাল কাটল নিশি
 একলা জেগে তোমার ব্যথায়,
 অশ্রু-মণির হার গাঁথেছি
 নয়ন-পাতার ঝালর-সূতায় ।
 তোমার তরে প্রাণ পোড়ানি
 কইতে নারি কারুর কাছে,
 আপন মনে তাই সারাদিন
 আপন ব্যথা কই আপনায় ॥

৪৫

বীরত্ব শেখ 'খয়বরী'-দ্বার
 ভগ্ন-কারী 'আলি'র কাছে,
 দান করে কয় শিখতে হলে
 'কুনবরের' ঐ বাদশা আছে ।

ওরে হাফিজ, পিয়াসী কি
তুই করুণা-বারির তরে ?
শারাব-সুধার সাকি জানে
উৎস তাহার কোন কানাচে ॥

৪৬

প্রিয়া তোমায় দেছে দাগা ?
বন্ধু, পীড়ন সহ্য কর !
আমার পরামর্শ শোন,
সকল ভুলে শারাব ধর ।
মতলব হাসিল কর তোমার
খুবসুবতী রতির সাথে,
অন্তর দিও না তারে
যে তব অযোগ্যতর ॥

৪৭

‘বাবিলনের’ যাদু বুঝি
গুরু তব চটুল চোখের,
হার মানে ও চোখের কাছে,
যাদুকরী সকল লোকের !
দুলছে যে ঐ অলক-গুঁছি
রূপকুমারীর কর্ণমূলে
দুলে যেন হাফিজের এই
কাব্য-মোতির চারপাশে ফের ॥

৪৮

দেখ রে বিকচ ফুলকুমারীর
রূপ-সুষমার আনন-শোভা,
দেখ বাদলের কাঁদন সাথে
ফুলের হাসি মনোলোভা !
কিসের এত ঠমক দেখায়
দেবদারু আজ দখনে হাওয়ায়,
ফুলরাণীকে করবে বীজন
দোল দিল এই আনন্দ বা !

৪৯

বুক হতে তার পিরান খোলে
 শ্যামাঙ্গী ঐ তব্বী যখন,
 ঠিক উপমা পাইনৈ বুজে
 সে মাধুরী দেখায় কেমন !
 এমনি তরল রূপ গো তাহার—
 বুকের তলে হৃদয় দেখায়,
 স্বচ্ছ দীঘির কালো জলে
 সুডোল পাষণ-নুড়ি যেমন ॥

৫০

মোমের বাতি ! পতঙ্গে এ
 ভুলেও কি গো স্মরণ কর ?
 আমার কাছে—ভালোবাসে
 ভুলে যাওয়া কেমনতর !
 তোমার তরে যে বেদনার
 ফলশুধারা বয় এ হৃদে,
 জানে শুধু জীবন-মরুর
 বালুর চর এ রৌদ্র-খর ॥

৫১

কে দেখেছে সরল মনের
 প্রিয়া গো—যে দেখব আমি !
 আমার মত অনেকে ঐ
 প্রাণ পীড়নের মুক্তিকামী ।
 করব কী আর—পরান-প্রিয়,
 তুমিই যদি কপট এত !
 আমার মত ভাগ্য সবার
 দেখনু সমান বিপথ-গামী ॥

৫২

সেই ভালো মোর—এই শারাবের
 পিয়াল দিয়ে তর করি দিল,
 যে সাধ আমার পুরল না তা
 ভুলব গো আজ করব বাতিল ।

ধার-করা এ জীবন আমার
বন্দী নিতি বুদ্ধি-কারায়,
আজ নিমিষের মুক্তি দেবো
তারে ভেঙে কারার পাঁচিল ॥

৫৩

আনন্দের ঐ বিহগ-পাথার
শব্দ শুনি অদূর নভে,
কিংবা গো ও নম্র-চিতের
ফুলবাগানের খোশবু হবে ।
অথবা ওই মৃদুল হাওয়া
তোমার শিরীন ঠোঁটের ভাষা,
কি এ যেন, এক অপরূপ
রূপকথা কি শুনছি তবে ?

৫৪

কাঁদি তোমার বিরহে গো
বেশি মোমের বাতির চেয়ে,
আরক্ত-ধার অশ্রু ঝরে
মদের সোরাই সম বেয়ে ।
আমি গো পান-পেয়ালা যেন,
হৃদয় যখন কৃপণ হেরি—
দূর বাঁশরি-বিনাপ শুনি
রক্ত-ধারায় উঠি ছেয়ে ॥

৫৫

পরান-পিয়া ! কাটাই যদি
তোমার সাথে একটি সে রাত,
বসন সম জড়িয়ে রব
নিমেষ পলক করব না পাত ।
ভয় কি আমার, যদিই সখি
তার পরদিন মৃত্যু আসে,
পান করেছি অমর-করা
তোমার ঠোঁটের 'আব-ই-হায়াত' ॥

৫৬

আলিঙ্গন ও চুম্বন হয়
 মরল তোমার খেয়ান করে
 তোমার ঠোঁটের চুম না পেয়ে
 পান্না-চুনি গেল মরে।
 কাহিনী আর বাড়াব না
 অল্পে সারি কল্পকথা,—
 মরল কেহ ফিরে এসে
 প্রতীক্ষাতে জীবন ধরে॥

৫৭

দয়িত মোর। অল্পে এত
 ছাড়ব তোমায় কেমন করি
 মরকত-নীল ও-কেশ-ফাঁসে
 যতক্ষণ না প্রাণ বিসরি।
 লোহিত চুনির ঠোঁট গো তোমার
 মোর জীবনী-শক্তি সে যে,
 লক্ষ প্রবাল বিনিময়েও
 পারব না তা দিতে, গোরি !

৫৮

দুঃখ ছাড়া এ-জীবনে
 হল না আর কিছুই হাসিল,
 বিষাদ হল সাথের সাথী
 তোমায় দিয়ে আমার এ দিল্।
 গোপন মনের স্বপন-সাথী
 পেলাম না গো বন্ধু কোনো,
 ব্যথাই আমার ব্যথার ব্যথী,
 তোমার মতই নিষ্ঠুর নিখিল॥

৫৯

আমায় প্রবোধ দেওয়ার তরে,
 ভোরের হাওয়া, বলো তারে—
 যে পাষাণীর মন গলে না
 আমার শত অশ্রু-ধারে,—

‘সুখে তুমি ঘুমাও নিতি
 দুলে দুলে আরাম-দোলায়,
 কার নয়নে ঘুম নাহি আর—
 উদয় কি হয় স্মরণ-পারে?’

৬০

আর কতদিন করবে, প্রিয়,
 এ উৎপীড়ন আমায় নিয়ে,
 বিনা কারণ বিশ্ব-নিখিল
 জ্বালাবে ও-হৃদয় দিয়ে?
 আশীর্বাদের সম অসি
 দুঃসাহসীর কঠোর হাতে,
 তোমার হাতে পড়লে তাহা
 করবে তা খুন তোমায় প্রিয়ে॥

৬১

কোরান হাদিস সবাই বলে—
 পবিত্র সে বেহেশ্ত নাকি,
 মিলবে সেখাই আসল শারাব
 তব্বী হুন্নী ডাগর-আঁখি !
 শারাব এবং প্রিয়ায় নিয়ে
 দিন কাটে মোর, দোষ কি তাতে?
 বেহেশতে যা হারাম নহে—
 মর্ত্যে হবে হারাম তা কি?

৬২

চন্দ্র সূর্য রাত্রি দিবা
 বিচিত্র সে আবেগ ভরে,
 ওগো প্রিয়, দেখি—তোমার
 ধূলির পরে প্রণাম করে !
 হৃদয় আঁখির সাধ হতে মোর
 করো না গো নিরাশ মোরে,
 রইবে দূরে—বসিয়ে আমায়
 প্রতীক্ষার ঐ অগ্নি পরে ?

৬৩

মদের মত কি আর আছে
 ভুলতে ব্যথা, তাতিয়ে তোলার ?
 যুদ্ধ করার সাধ জাগে কি
 সেনার সাথে এই বেদনার ?
 এই ত তোমার কাঁচা মাথা,
 এরির মাঝে বাতিল শারাব ?
 কাঁচা সবুজ বয়েসই ত
 খুশির, গানের, পান-পিয়ালার ॥

৬৪

পাতার পর্দানশীন মুকুল,
 ফুটেই হেরে তোমায় পাছে !
 মাতোয়াল 'নার্গিস' শরমে
 তোমায় হেরি মরণ যাচে ।
 তোমার কাছে রূপের বড়াই
 কেমন করে করবে গো ফুল ?
 ফুল পেল রূপ চাঁদ চোঁয়ায়ে,
 চাঁদ পেল রূপ তোমার কাছে ॥

৬৫

আশ্বাসেরই বানী তোমার
 প্রতীক্ষার ঐ দূর সাহায্য
 ফিরছে আজো, আর কতদিন
 ঢাকবে রবি মরুর ধুলায় ?
 বাঘের মুখে যাও গো যদি
 লালসা আর লোভের বশে,
 আখেরে যে শিকার হবে
 গোরের হাতে মাটির তলায় !

৬৬

তোমার আঁখি—জানে যাহা
 বঞ্চনা আর ছল-চাতুরী,
 চমকে বেড়ায় অসি যেন
 রণাঙ্গণে ঘুরি ঘুরি ।

তড়িৎ-জ্বালার ও-চোখ ত্বরিত
 গোল বাধাবে ঝুঁকুর সাথে,
 যে হিয়াতে শিলা ঝরে,
 হায় গো তারি তরে ঝুরি ॥

৬৭

দাও এ হাতে, ফুঁটি শিকার
 করে সদা যে বাজপাখি,
 প্রিয়ার মত প্রিয়স্বদা
 মদ-পিয়ালা দাও গো সাকি !
 কুণ্ঠিত ঐ কুন্তল—যা
 পাক খেয়েছে শিকলি সম—
 আন গো তায় দোস্ত, কর
 এই দিওয়ানার হস্ত-রাখি !

৬৮

হায় রে, আমার এ বদনসিব
 হত যদি মনের মত !
 কিংবা গ্রহের চক্র ঘুরে
 আবার আমার বন্ধু হত !
 পালিয়ে যেত যৌবন মোর
 যখন হাতের মুঠি হতে,
 রেকাব সম রাখত ধরে
 এই জরারে সমুন্নত ॥

৬৯

ফুল্লমুখী দিল-পিয়ারী,
 বীণা, রেণু, একটু আড়াল,
 এক রেকাবী কাবাব, সাথে
 এক পেয়ালি শিরাজী লাল—
 ধমনীতে উঠবে জ্বলে
 লকলকিয়ে অগ্নিশিখা,—
 ‘হাতেম-তাই-এর অনুগ্রহও
 চাই না তখন মুহূর্ত কাল !

৭০

শাহী তখতে বসেছে ফুল—
 দেখনু সেদিন গুল-বাগিচায়,
 কইনু—শোনো, সত্য যদি
 দীপ্ত তুমি রাজ-মহিমায়,
 নিষ্পাপ এক কিশোর আমি
 জ্বালাও তারেই রাত্রি দিবা
 তবু তোমার স্পর্শে না পাপ,
 চিরন্তনী, আফসোস, হয় !

৭১

বন্দী বোঁটায় কইল কুসুম,
 থাকত যদি শক্তি আমার
 পালিয়ে যাবার রাস্তা পেলে
 পালিয়ে যেতাম দূর-বন পার ।
 বিনা অপরাধেই মোরে
 এমন করে জ্বালায় যদি,
 সত্যিকারের দোষী হলে
 না জানি সে করত কি আর ॥

৭২

সেও এ মন্দ-ভাগ্য সম
 এমনি জ্বালে ফাঁসত যদি,
 হত লাখো খারাবী তার
 শারাব নিয়ে নিরবধি ।
 আমি মাতাল, প্রেম-বিলাসী,
 পাগল, ভুবন-দাহন-কারী,—
 বসলে কাছে রটবে কুযশ
 তাই ত থাকি দুয়ার রোধি ॥

৭৩

ওরে হাফিজ, শেষ কর তোর
 কৃত্রিম এই কলমবাজি !

হল সময়—খোলা পাতা

ঝোলায় তুলে রাখার আঙ্গি ।

নীরব হয়ে বসার পাল্লা

এবার রে তোর, আজকে শুধু

শূন্য গেলাস টাইটুম্বুর,

কর রে ঢেলে শেষ শিরাজী ॥

—তামাম শোদ—

বুলবুল-ই-শিরাজ মরামী কবি হাফিজের সঞ্ছিপ্ত জীবনী

শিরাজ ইরানের মদিনা, পারস্যের তীর্থভূমি। শিরাজেরই মোসল্লা নামক স্থানে বিশ্ববিশ্রুত কবি হাফিজ চতুর্দশ শতাব্দীর প্রথম ভাগে জন্মগ্রহণ করেন।

ইরানের এক নীশাপুর (ওমর খাইয়াম-এর জন্মভূমি) ছাড়া আর কোনো নগরই শিরাজের মতো বিশ্বজোড়া খ্যাতি লাভ করে নাই। ইরানের প্রায় সমস্ত শ্রেষ্ঠ কবিরই লীলানিকেতন এই শিরাজ।

ইরানীরা হাফিজকে আদর করিয়া ‘বুলবুল-ই-শিরাজ’ বা শিরাজের বুলবুলি বলিয়া সম্ভাষণ করে।

হাফিজকে তাহার শুধু কবি বলিয়াই ভালোবাসে না। তাহারা হাফিজকে ‘লিসান-উল-গায়েব’ (অজ্ঞাতের বানী), ‘তর্জমান-উল-আসরার’ (রহস্যের মর্মসন্ধানী) বলিয়াই অধিকতর শ্রদ্ধা করে। হাফিজের কবর আজ ইরানের শুধু জ্ঞানী-গুণিজনের শ্রদ্ধার স্থান নয়, সর্বসাধারণের কাছে ‘দর্গা’, পীরের আস্তানা।

হাফিজের মৃত্যুর একশত বৎসরের মধ্যে তাঁহার কোনো জীবনী রচিত হয় নাই। কাজেই তাঁহার জীবনের অধিকাংশ ঘটনাই অন্ধকারের নীল মঞ্জুষায় চির-আবদ্ধ রহিয়া গিয়াছে। তাঁহার জন্ম-মৃত্যুর দিন লইয়া ইরানেও তাই নানা মুনির নানা মত। হাফিজের বন্ধু ও তাঁহার কবিতাসমূহের (দীওয়ানের) মালিকর গুল-আদামের মতে হাফিজের মৃত্যু-সাল ৭৯১ হিজরি বা ১৩৮৯ খ্রিস্টাব্দ। কিন্তু তিনিও কবির সঠিক জন্ম-সাল দিতে পারেন নাই।

হাফিজের পিতা বাহাউদ্দীন ইস্পাহান নগরী হইতে ব্যবসা উপলক্ষে শিরাজে আসিয়া বসবাস করেন। তিনি ব্যবসায়ে বেশ সমৃদ্ধিও লাভ করেন, কিন্তু মৃত্যুসময়ে সমস্ত ব্যবসা এমন গোলমাঙ্গে জড়িত করিয়া রাখিয়া যান যে, শিশু হাফিজ ও তাঁহার মাতা ঐশ্বর্যের কোল হইতে একেবারে দারিদ্র্যের করাল গ্রাসে আসিয়া পতিত হন। বাধ্য হইয়া তখন হাফিজকে মাথার ঘাম পায়ে ফেলিয়া অর্থোপার্জন করিতে হয়। কোনো কোনো জীবনী লেখক বলেন, দারিদ্র্যের নিষ্পেষণে হাফিজকে তাঁহার মাতা অন্য একজন সঙ্গতিসম্পন্ন বণিকের হাতে সমর্পণ করেন। সেখানে থাকিয়াই হাফিজ পড়াশুনা করিবার অবকাশ পান।

যে প্রকারেই হউক, হাফিজ যে কবি-খ্যাতি লাভ করিবার পূর্বে বিশেষরূপে জ্ঞান অর্জন করিয়াছিলেন, তাহা তাঁহার কবিতা পড়িয়াই বুঝা যায়।

হাফিজের আসল নাম শামসুদ্দিন মোহাম্মদ। ‘হাফিজ’ তাঁহার ‘তখল্লুস’, অর্থাৎ কবিতার ভণিতায় ব্যবহৃত উপ-নাম। যাঁহারা সম্পূর্ণ কোরান কণ্ঠস্থ করিতে পারেন, তাঁহাদিগকে মুসলমানেরা ‘হাফিজ’ বলেন। তাঁহার জীবনী-লেখকগণও বলেন, হাফিজ তাঁহার পাঠ্যাবস্থায় কোরান কণ্ঠস্থ করিয়াছিলেন।

তাঁহার পাঠ্যাবস্থাতেই তিনি স্বভাবদত্ত শক্তিবলে কবিতা রচনা করিতে আরম্ভ করেন, কিন্তু তাহা তেমন আদর লাভ করিতে পারে নাই। কিছুদিন পরে ‘বাবা-কুহী’ নামক শিরাজের উত্তরে পর্বতোপরিস্থ এক দর্গায় (মন্দিরে) ইমাম আলি নামক এক দরবেশের সহিত তাঁহার সাক্ষাৎ হয়। সেদিন ‘বাবা-কুহী’তে সমস্ত রাত্রি ধরিয়া ধর্মোৎসব চলিতেছিল। হাফিজও ঐ উৎসবে যোগদান করিতে গিয়াছিলেন। ইমাম আলি হাফিজকে রহস্যময় কোনো স্বর্গীয় খাদ্য খাইতে দেন এবং বলেন, ইহার পরেই হাফিজ কাব্যলক্ষ্মীর রহস্যপুরীর সকল ঐশ্বর্যের অধিকারী হইবে। ইহা সত্য কিনা জানি না, কিন্তু হাফিজের সমস্ত জীবনী-লেখকই এই ঘটনার উল্লেখ করিয়াছেন। শুধু উল্লেখ নয়, বিশ্বাসও করিয়াছেন।

হাফিজ তাঁহার জীবিতকালে তাঁহার কবিতাসমূহ (দীওয়ান) সংগ্রহ করিয়া যান নাই। তাঁহার বন্ধু গুল-আন্দামই সর্বপ্রথম তাঁহার মৃত্যুর পর ‘দীওয়ান’ আকারে হাফিজের সমস্ত কবিতা সংগ্রহ ও সংগৃহীত করেন। কাজেই—মনে হয়, হাফিজের পঞ্চাশতাবধিক যে কবিতা আমরা এখন পাইয়াছি, তাহা ছাড়াও অনেক কবিতা হারাইয়া গিয়াছে, বা তিনি সংগ্রহ করিতে পারেন নাই।

হাফিজ ছিলেন উদাসীন সুফী। তাঁহার নিজের কবিতার প্রতি তাঁহার মমতাও তেমন ছিল না। তাই কবিতা লিখিবার পরই তাঁহার বন্ধুবান্ধব কেহ সংগ্রহ না করিয়া রাখিলে তাহা হারাইয়া যাইত। কিন্তু তাঁহার কবিতার অধিকাংশই গজল-গান বলিয়া, লেখা হইবামাত্র মুখে মুখে গীত হইত। ধর্মমন্দির হইতে আরম্ভ করিয়া পানশালা পর্যন্ত সকল স্থানেই তাঁহার গান আদরের সহিত গীত হইত।

হাফিজের গান অতল গভীর সমুদ্রের মতো। কূলের পথিক যেমন তাহার বিশালতা, তরঙ্গলীলা দেখিয়া অবাক বিস্ময়ে চাহিয়া থাকে, অতল-তলের সন্ধানী ডুবুরী তেমনি তাহার তলদেশে অজস্র মণিমুক্তার সন্ধান পায়। তাহার উপরে যেমন ছন্দ-নর্তন, বিপুল বিশালতা; নিম্নে তেমনি অতল গভীর প্রশান্তি, মহিমা। ...

আকাশের নীল পেয়ালা উপচিয়া আলোর শিরাজী ধরণীতে গড়াইয়া পড়ে, উন্মত্ত ধরণী নাচিয়া নাচিয়া শূন্যে ঘুরিয়া ফেরে। তারকার মণি-মানিক্য-খচিত আকাশ কি পেয়ালার সাকিকে কবি ডাকে, শারাব ভিক্ষা করে আর গান গায়—‘বদেহ সাকি ময়ে বাকি !’ ওগো সাকি, আরো আরো শারাব ঢাল ! কিছুই বাকি রাখিও না ! পাত্র উজ্জাড় করিয়া শারাব ঢাল ! ...

কেহ কেহ বলেন, হাফিজ অভিমান করিয়াই তাঁহার জীবিতকালে বহু বন্ধু-বান্ধবের শত সনির্বন্ধ অনুরোধ সত্ত্বেও তাঁহার কবিতাসমূহ সংগ্রহ করিয়া যান নাই। হাফিজের সময়ে শিরাজের শাসনকর্তা ছিলেন শাহ আবু ইসহাক ইঞ্জা। তিনি নিজেও একজন

কবি ও সমঝদার ছিলেন। তিনি হাফিজের অন্যতম ভক্ত এবং পৃষ্ঠপোষক ছিলেন। ইহার কিছুদিন পরে শাহসুজা শিরাজের শাসনকর্তা হন। সুজা ইমাদ কিরমানী নামক একজন কবির অতিশয় ভক্ত ছিলেন। এমনকি তিনি হাফিজকে বড় কবি বলিয়াই স্বীকার করিতেন না। শাহ সুজাও নিজে কবি ছিলেন এবং তিনি প্রতিদ্বন্দ্বিতায় হাফিজের সমকক্ষ ছিলেন না বলিয়াই ইমাদকে বড় কবি বলিয়া হাফিজকে হেয় করিবার প্রয়াস পাইতেন। একবার শাহ সুজা হাফিজের কবিতার নিন্দাবাদ করায়, হাফিজ উত্তর দেন, ‘তবুও আমার এই কবিতা সারা দেশের লোকে কণ্ঠস্থ, প্রশংসা এবং আবৃত্তি করে, কিন্তু এই নগরে এমন অনেক কবি আছে, যাহাদের কবিতা এই শহরের সীমা অতিক্রম করিতে পারে না।’

এই উত্তর শুনিয়া শাহ সুজার বুঝিতে বাকি রহিল না যে, ইহা তাঁহাকেই উল্লেখ করিয়া বলা হইয়াছে। কিন্তু তিনি যতই ক্রোধান্বিত হন; কিছু করিতেও পারিলেন না। ইহার অল্পদিন পরেই হাফিজের দুই লাইন কবিতা তাঁহার হস্তগত হয়।—

‘গর মুসলমানী আজ্ আনসত্ কে হাফিজ দারদ

ওয়ায় আগর আজ্ পেয় ইমরোজ বুয়দ ফরদায়ে।’

‘হাফিজের যে ধর্ম, ইহাই যদি মুসলমান ধর্ম হয়, হায়, তাহা হইলে কবে আজ্কার দিন শেষ হইয়া কল্যাণ আসিবে!’

এই কবিতার সুবিধা লইয়া শাহ সুজা মনস্থ করেন, হাফিজের বিধর্মী বলিয়া বিচার হইবে। এই সংবাদ পাইয়া হাফিজ অতিশয় সন্তুষ্ট হইয়া পড়েন। সেই সময় সৌভাগ্যক্রমে শিরাজে মৌলানা জায়নুদ্দিন আবু বকর তায়াবাদি উপস্থিত ছিলেন। হাফিজ গিয়া তাঁহার পরামর্শ ভিক্ষা করেন। তিনি হাফিজকে উহার সহিত আরও এমন দুই লাইন কবিতা জুড়িয়া দিতে বলেন, যাহার দ্বারা পূর্বের দুই লাইন কবিতার অর্থ একেবারে উল্টা হইয়া যায়।

তদনুযায়ী হাফিজ উক্ত কবিতার সঙ্গে নিম্নলিখিত দুই লাইন কবিতা জুড়িয়া দেন।—

‘ই হদিসম চে খোশ্ আমদ কে সহরগাহ্মি গোফত্

বর দরে ময়কদয়ে বা দফ ও নেয় তরসায়ে।’

‘একজন খ্রিস্টধর্মী যখন এক সরাই-এর দ্বারে বসিয়া তাম্বুরা এবং বাঁশ লইয়া এই গান গাহিতেছিল, তখন সেই প্রাতঃকালে আমার কাছে সে গান কেমন মজার শুনাইতেছিল!’

ইহার পরে নাস্তিক বলিয়া অভিযুক্ত হইয়া তিনি শেষের দুই লাইন কবিতা দেখাইয়া বলেন যে, পরিপূর্ণ কবিতাটি এই। সুতরাং বিচারে তিনি মুক্তি পান।...

হাফিজ সম্বন্ধে বিশ্ববিজয়ী বীর তৈমুরকে লইয়া একটি গল্প প্রচলিত আছে। হাফিজের নিম্নলিখিত দুই লাইন কবিতা জগদ্বিখ্যাত হইয়া গিয়াছে :—

‘আগর আঁ তুর্কে শিরাজী বেদস্ত আরদ দিলে মারা,

বখালে হিন্দুয়শ্ বখশ্ম সমরকন্দ ও বোখারা রা!!’

‘যদিই কান্তা শিরাজ-সজ্জী ফেরৎ দেয় মোর চোরাই দিল ফের,
সমরকন্দ ও বোখারায় দিই বদল তার লাল গালের তিলটেব !’

সেই সময় তৈমুরের সাম্রাজ্যের রাজধানী ছিল সমরকন্দ। হাফিজ তাঁহার প্রিয়র
গালের তিলেয় জন্য তৈমুরের সাম্রাজ্য ও রাজধানী বিলাইয়া দিতে চাহেন শুনিয়া তৈমুর
অতিশয় ক্রোধান্বিত হইয়া পারস্য জয়ের সময় হাফিজকে ডাকিয়া পাঠান। উপায়ান্তর
না দেখিয়া হাফিজ তৈমুরকে বলেন যে, তিনি ভুল শুনিয়াছেন, শেষের লাইনের
‘সমরকন্দ ও বোখারার’ পরিবর্তে ‘দো মন কন্দ ও সি খোর্মারা’ হইবে।

‘আমি তাহার গালের তিলের বদলে দু’মন চিনি ও তিন মণ খজুর দান করিব !’

কেহ কেহ বলেন, হাফিজ এ উত্তর দেন নাই। তিনি নাকি দীর্ঘ কুনিশ করিয়া
বলিয়াছিলেন, ‘সম্রাট ! আমি আজকাল এই রকমই অমিতব্যয়ী হইয়া পড়িয়াছি !’
এই উত্তর শুনিয়া তৈমুর এত আনন্দ লাভ করেন যে, হাফিজকে শাস্তি দেওয়ার
পরিবর্তে বহুমূল্য পারিতোষিক প্রদান করেন।

হাফিজের নামে এইরূপ বহু গল্প প্রচলিত আছে, কিন্তু তাহার অধিকাংশই
বিশ্বাসযোগ্য নহে।

হাফিজের কবিতা পড়িয়া একবার মনে হয়, তিনি উদাসীন সুফী ছিলেন। আবার
দুই একটি কবিতা পড়িয়া মনে হয়, তিনি বুঝি সংসারীও ছিলেন। বিশেষ করিয়া
তাঁহার নিম্নলিখিত কবিতা পড়িয়া মনে হয়, ইহা তাঁহার কোনো প্রিয় পুত্রের
অকালমৃত্যুকে উল্লেখ করিয়া লেখা হইয়াছিল।—

‘দিলা দীদী কে আঁ ফরজানা ফরজন্দ

চে দিদ্ আন্দর খমে ই তাকে রঙ্গিন

বজ্রায়ে লগুহে সিমিন্দর কিনারশ্

ফলকে বর শের নেহাদশ্ লগুহে সঙ্গীন।’

‘ওরে হৃদয় ! তুই দেখেছিস—

পুত্র আমার আমার কোলে,

কি পেয়েছে এই সে রঙিন

গগন-চন্দ্রাতপের তলে।

সোনার তাবিজ রূপার সেলোট

মানাত না বুকে রে যার,

পাথর চাপা দিল বিধি

হায় কবরের সিখানে তার !’

১৩৬২ খ্রিস্টাব্দের ২৪শে ডিসেম্বর তাঁহার আর একটি পুত্র সন্তানের মৃত্যু হয়।
ইহাও তাঁহার অন্য এক কবিতা পড়িয়া জানা যায়।

হাফিজের সমস্ত কাব্য ‘শাখ-ই-নবাত’ নামক কোনো ইরানী সুন্দরীর স্তবগানে
মুখরিত। অনেকে বলেন, ‘শাখ-ই-নবাত’ হাফিজের দেওয়া আদরের নাম। উহার

আসল নাম হাফিজ গোপন করিয়া গিয়াছেন। কোন ভাগ্যবতী এই কবির প্রিয়া ছিলেন, কোথায় ছিল তাঁর কুটির, ইহা লইয়া অনেকে অনেক জল্পনা-কল্পনা করিয়াছেন। রহস্য-সন্ধানীদের কাছে এই হরিণ-আঁখি সুন্দরী আজো রহস্যের অস্তরালেই রহিয়া গিয়াছেন।

কেহ কেহ বলেন, এই শাখ-ই-নবাতের সহিতই হাফিজের বিবাহ হয় এবং হাফিজের জীবিতকালেই তাঁহার মৃত্যু হয়। কিন্তু কোনো জীবনী-লেখকই একথা নিশ্চিতরূপে বলিতে পারেন নাই।

হাফিজ যৌবনে হয়ত শারাব-সাকির উপাসক ছিলেন, পরে যে সুফী সাধকরূপে দেশের শ্রদ্ধা আকর্ষণ করিয়াছিলেন তাহা প্রত্যেক ইরানীই বিশ্বাস করে।

তাঁহার মৃত্যু সম্বন্ধে একটি বিস্ময়কর গল্প শুনা যায়। শিবলি নোমানী, ব্রাউন সাহেব প্রভৃতি পারস্য-সাহিত্যের সকল অভিজ্ঞ সমালোচকই এই ঘটনাস্থল উল্লেখ করিয়াছেন।

হাফিজের মৃত্যুর পর একদল লোক তাঁহার ‘জানাজা’ পড়িতে (মুসলমানী মতে অন্ত্যেষ্টিক্রিয়া করিতে) ও কবর দিতে অসম্মত হয়। হাফিজের ভক্তদলের সহিত ইহা লইয়া বিসম্বাদের সৃষ্টি হইলে কয়েকজনের মধ্যস্থতায় উভয় দলের মধ্যে এই শর্তে রফা হয় যে, হাফিজের সমস্ত কবিতা একত্র করিয়া একজন লোক তাঁহার যে কোনো স্থানে খুলিয়া দিবে ; সেই পৃষ্ঠার প্রথম দুই লাইন কবিতা পড়িয়া হাফিজের কি ধর্ম ছিল তাহা ধরিয়া লওয়া হইবে।

আশ্চর্যের বিষয়, এইরূপে নিম্নলিখিত দুই লাইন কবিতা পাওয়া গিয়াছিল।—

‘কদমে দরিগ মদার আজ জানাজায়ে হাফিজ,
কে গরচে গর কে গোনাহস্ত মি রওদ্ বেহেশ্ত।’

‘হাফিজের এই শব হতে গো তুলো না কো চরণ প্রভু
যদিও সে মগ্ন পাপে বেহেশ্ত সে যাবে তবু।’

ইহার পরে উভয় দল মিলিয়া মহাসমারোহে হাফিজকে এক আঙুর-বাগানে সমাহিত করেন। সে স্থান আজিও ‘হাফিজিয়া’ নামে প্রসিদ্ধ।

দেশ-বিদেশ হইতে লোক আসিয়া আজও কবির কবরে শ্রদ্ধাঞ্জলি অর্পণ করে।

কথিত আছে, বাংলার কোনো শাসনকর্তা হাফিজকে তাঁহার সভায় আমন্ত্রণ করিয়া পাঠান। হাফিজ আসিতে সসম্মতও হইয়াছিলেন। পারস্য উপসাগরের কূলে আসিয়া যখন তিনি জাহাজে উঠিতে যাইবেন, সেই সময় ভীষণ বড় ওঠে। ইহাতে হাফিজ দৈব প্রতিকূল ভাবিয়া আবার শিরাজে ফিরিয়া আসেন এবং বাংলার শাসনকর্তার কাছে যে কবিতাটি পাঠাইয়া দেন তাহার মর্মার্থ এইরূপ :

‘আজকে পাঠাই বাংলায় যে ইরানের এই ইক্ষু-শাখা,
এতেই হবে ভারতের সব তোতার চক্ষু মিটিমাখা।
দেখ গো আজ কল্পলোকের কাব্যদূতীর অসম সাহস,

এক বছরের পথ যাবে যে, একটি নিশি যাহার বয়স।’

‘হাফিজ পারস্য ছাড়িয়া আর কখনো কোথাও যান নাই। স্বদেশ এবং স্বপত্নীর প্রতি তাঁহার অণু-পরমাণুতে অপূর্ব মমতা সঞ্চিত ছিল। বহু কবিতায় তাঁহার বাস-পত্নী ‘মোসল্লা’ এবং ‘রোক্তাবাদে’র খালের প্রশংসা দেখিতে পাওয়া যায়।

হাফিজ নিজের সম্বন্ধে বলিয়া গিয়াছেন—

‘যর সরে তরবতে মা চুণ্ডজরি হিম্মত খাহ,
কে জিয়ারতগহে রিন্দা জাহাঁ খাহেদ শোদ!’

‘আমার গোরের পার্শ্ব দিয়া যেতে চেয়ো আশিস্ তুমি,

এ গোর হবে ধর্ম-স্বাধীন নিখিল-প্রেমিক-তীর্থভূমি!’

আজ সত্য সত্যই হাফিজের কবর নিখিলের প্রেমিকের তীর্থভূমি হইয়া উঠিয়াছে।